

Comentario

E YAMADA DI BOYCOT DI PARTIDO M.E.P.

Historia di un pais semper tabata y lo ta topico di discusion. Hasta di discusionnan emocional. Cu tempo, ora hende madura y por evalua y describi sucesonan historico cu mas obhetividad, e historia ta bira mas completo, mas balansa y mas aceptable pa tur hende. Por ta cu e historia di Aruba ta mucho recien. Emocionnan ta halto ainda y e distancia obhetivo necesario no tey ainda pa nos uni tras di un version di loke ta nos historia. Interpretacionnan di e historia semper lo tin y esey ta enriquece e historia. Pero no e instigacion di division di un Pueblo ariba su historia. Esey ta destruccion di un nacion naciente!

E inauguracion di e Plaza 18 di Maart e aña aki, e dunamento di honor na e mas cu 1.200 persona y nan lider politico, cu den e añanan 1947-1948 a firma actonan di notario pa sostene e motion cu Shon A Eman a entrega durante di Conferencia di Mesa Rondo na Hulanda, pa haya reconocimiento di e derecho di Aruba pa un Status Aparte den Reino, ta motibo reaccionnan y acusacionnan masha serio di banda di e partido MEP.

Na parecer di hopi hende, ningun di e critica di MEP awe 1996 ta kita nada di e gran balor y rol cu Shon A tabata tin den e lucha pa Status Aparte di Aruba. E propio fundador di MEP, defunto Betico Croes mes a reconoce esey y den Shon A a encontra un idolo politico. Pero e MEP di awe no ta e MEP di Betico mas. Pa yama Shon A un simple mensahero di Pueblo di Aruba ta un gran honor. Ta hopi cu realmente ta stima nan pais ta desea di por sirbi nan pais den momentonan clave manera Shon A a haci. Hasta den funcion di mensahero. Ora trata di bagatelize Shon A, ta ofende alavez tur e hendenan cu pa añanan a sostene Shon A den su lucha pa Arubianonan y Aruba haya reconocimiento y respet. Ta ofende tur e hendenan cu e tabata yuda gratuitamente como abogado. Ta ofende memoria di miles di Arubiano cu tabata cana oranan den solo pa bay encontra cune den un tempo cu Aruba tabata uni tras di un lucha. E lucha pa ta "baas den nan propio cas." Ta pesey cu e critica y bagatelizacion di esnan cu a firma e actonan y cu ta bay worde honrá awor no ta nada husto. Ta e hendenan aki, di tur bario di Aruba, di tur nivel social, cu a haci e lucha uno fuerte, uno cu a haya reconocimiento 50 aña despues. Pero ta cu nan e lucha a cuminsa haya forma concreto y ta di lamenta cu awe tin hende cu no por aprecia esaki. Si ta baridor di caya nan ta of no, ta nan a sostene e lucha. Y nan voz tambe tabata y ta conta. Ta tristo cu awe ainda tin "lideman politico" aki na Aruba cu no por respecta esaki.

Envez di muestra grandeza y duna respet, honor y reconocimiento pa tur e lideman di nos Pueblo, MEP a scoge pa dividi Pueblo awe cu acusacionnan baho y referencianan fuera di nan contexto. Pasobra ningun hende of lider ta infalible. Tur lider politico y nan partidonan a comete eroman grandi y chikito. Incluso MEP y nan lideman actual. E critica di MEP ta cay masha malo den Pueblo y ta muestra mas ariba frustracion politico, oportunismo, y hipocrecia. Lubidando tur e bon cu Shon A a haci pa moles di Arubiano y pa Aruba. Lamentable ta cu ta trata aki di un di e poco personahenan grandi cu nos isla chikito tin y cu por uni nos tras di un identidad Arubiano cu e caracter falibel pero luchador di Henny Eman. Shon A, Juancho Irausquin y Betico Croes. MEP no tin e grandeza ainda di duna respet y honor na e personanan aki y consecuentemente ta keda pega den discusionnan politico partidista cu en realidad nos a clausura!

E yamada di MEP pa boycotea tur e eventonan rond di nos Dia Nacional 18 di MAART ta un eror historico grandi y un ofensa contra nos Pueblo. Un yamada cu tur e lideman grandi di Aruba lo a considera un ofensa. Nan a bira grandi door di halza nan mes ariba e pensamentonan partidista y trata di uni nos Pueblo. E MEP di awe no por esey ainda. No ta por nada Betico, como seguidor politico di Shon A a scoge e dia 18 di Maart y hacié nos Dia Nacional! El a reconoce e importancia di Shon A y e Dia Nacional aki pa nos pais!

PA SACA PASAPORTE NOBO TA DURA COMO TRES SIMAN

ORANJETEAD (AAN): Ya cu e tempo di vakantie escolar ta na caminda, esta e temporada di Semana Santa y Pasco Grandi, Registro Civil y Censo su hefe ta trece na conocimiento di un y tur cu tin pensa di viaha, pa tene bon cuenta cu nan paspoort mester tin un validez di por lo menos seis (6) luna pa por efectua un viahe pa cierto paisnan den nos region, por ehemple Venezuela y Colombia.

Ademas mester tene na

cuenta cu pa saca un paspoort nobo ta tuma por lo menos dos pa tres siman, esaki debi na e tantísimo petición pa paspoort cu ta drenta na dicho departamento diaiamente.

No warda te na e ultima hora pa bo haci esaki. Corda cu no tin verlenging mas di paspoort. Tur hende mester haci petición personalmente. Tambe tene na cuenta cu ora ta bai saca paspoort pa yiunan menor di edad, ambos mayor mester ta presente of esun cu ta voogd(es) di e menor, pa cu nan por duna consentimiento

pa e menor (nan). E menor-nan tambe mester ta presente en conexion cu midimento y si nan ta ariba seis aña pa nan por firma e petición. E mayor-nan tin cu trece nan trouwboek y cu un identificación sea un cedula, paspoort y e voogdnan cu nan documento di voogddij.

En especial ta pidi un y tur y especial esnan cu ta bai afor pa dokter pa tuma bon nota di e puntanan ariba menciona y check e papelnan na tempo pa evita cualquier inconveniencia of experiencia amargo.

DIASABRA LO TIN MISA NA PLAZA BETICO CROES

ORANJESTAD (AAN): Diasabra 16 di Maart lo bay tin Un Santo Sacrificio di Misa pa conmemora e di 10 aña di Status Aparte y e di 20 aña di nos Himno y Bandera. Esaki lo tuma lugar ariba Plaza Betico Croes, pa 7'or di anochi, cual lo ser ofrece pa

Obispo Ellis y diferente otro pastor di Aruba.

Coro Santa Ana di Noord lo canta na e Misa aki. Un invitacion na tur e gruponan religioso, manera Legion di Maria, Carismatica, gruponan social, verkenners y welpnan, schoolnan y henter comunidad pa ta presente.

Ban reza conhuntamente y gradici Señor pa tur nos logronan y alavez reza conhuntamente pa proteccion, futuro y progreso di nos pais Aruba.

E Santo Sacrificio di Misa aki lo ser transmiti vivo y directo pa Canal 13 TeleAruba.

MONEDANAN DI STATUS APARTE TIN NIFICACION HISTORICO



ORANJESTAD (AAN): -- Chris van Dranen, director di e institucion cu ta traha moneda na Hulanda (De Nederlandse Munt) a haci entrega di dos serie di moneda conmemorativo na Armand Engelbrecht, ministro di Finanzas.

E monedanan aki a wordo traha na ocasion di e celebracion di diez aña di Status Aparte di Aruba.

E serienan ta inclui un can-

tidad varia di moneda y nan ta bin den materialnan di oro y plata.

E prome lote a caba, unda cu 350 a wordo bendi.

E lote nobo lo wordo entrega riba 15 di maart.

E monedanan conmemorativo ta bin na balor nominal di 50 (plata) y 100 Florin (oro).

Nan balor real sinembargo, ta mas cu e 50 y 100 Florin

ey, ya cu ta trata di loke nan ta yama 'proof quality'.

E monedanan por wordo usa den trafico normal di negoshi, loke ta e motibo tambe cu nan ta bin den metal.

E interes cu tin pa e monedanan a resulta di ta enorme.

Nan tin un significacion historico grandi, como cu nan ta e conmemoracion di e lucha pa autodeterminacion di nos pueblo.